

同大慶則君臣上下素服以出非但於義未安詔使知之則必為駭訝出宮時自 上黑袍黑輦厥後接見出宮時俱仍此服宜當請更議大臣定奪議于大臣則請依該曹啓辭行之 從之○甲子禮曹啓曰天使入京則王世子似當有接見之禮儀註節目令該曹講定矣王世子受冊命於天朝之後則迎詔及宴享俱當出參又當有別行請宴之禮矣今則時未受冊於天朝似難依例接見但天使若或聞知而請見則不可不見冠服及服色議大臣預為講定宜當 荅曰知道○遠接使金瑬馳啓曰譯官張禮忠隨問安使見正使則自 上禮單只點受黃毛筆十枚餘皆還給副使亦然正使則容貌辭氣極其端的副使肥胖嚴峻性頗苛細云正使問曰國王拜帖何用藍籤禮忠荅曰國王於本年正月丁生母憂矣正使曰是則爾國私喪今此詔勅乃聖天子莫大之慶何其不知禮如是之甚也此後藍籤帖子俺斷不受爾等可傳語遠接陪臣後勿如是禮忠等荅曰小邦粗知禮義國王迎詔勅時例用吉服而與老爺相會之時則方在哀疚之中當用素服拜帖用藍籤亦其禮也正使荅曰俺以不受藍籤之意說與爾們明日不須更言云政院請改用紅籤 從之○夜坤方東方有氣如火光○乙丑 上幸魂宮參四虞○丙寅 上幸魂宮參五虞○禮曹